

欽定熱河志

欽定熱河志卷五

天章五

御製詩

山店 丙子

山店誅茅亦易成，居民火種復刀耕。孳豚處處牢堆石，防虎家家柵樹荆。粗糲聊安衣食計，逍遙且免市鄽征。前驅俞騎休呵譙，政欲窮簷悉隱情。

朝嵐

朝嵐夕靄人常言，率擬霞標而已矣。不知斯亦氣流行，如潮汐自滄海起。兩山之間必夾川，萬澗千溪匯於此。嵐靄定從川下降，倒行逆施無其理。塞上厥候益分明，曉暮添衣乃所以。濛濛淅淅中鞞鞭，自遠望之謂雲裏。

暖

出關颯生涼，塞上疑已霜。崖口昨來入，反覺暖異常。巨嶺樹多綠，綿谷草未黃。侵晨著絮衣，卓午換袷裳。對時體溫肅，隨地愛景光。

九月朔日

秋惟季月清，塞至興安迥。潦盡潭益澄，葉落山愈靜。松蒼識勁節，楓丹繪餘景。肄武既云要，勞衆亦應省。事鮮兩全方，為是頻耿耿。

霜

盧龍真是塞，青女每先時。不待雲鴻報，還惟巖鹿知。素華明蓋羽，颯冷拂鞭絲。為憶從軍者，天涯露宿披。

山月

依依漸出林，罔罔高映岑。瑟瑟秋方季，寥寥山復深。網水上下光，呦鹿悠揚音。颯景自伊古，靜會偶於今。徘徊入我窗，武帳延清襟。坐見林巒間，適者獵騎駸。生風興固豪，耐可閒對心。

雪

破曉雪濃傳罷獵，霑衣將謂雨霏絲。須臾亂灑冰花落，塞景離奇幻若斯。翠柏丹楓瓊蕊結，側峰橫嶺玉屏開。營邱畫與樊川句，問爾何從見此來。

既密還疏飄散漫，雖寒不濕靜便娟。便教收取三清煮，武帳由來有宿緣。

丙寅十月，定興道中，雪水煮三清茶，曾題句。

遇閨

遇閨深山秋益深，每因趁暖一幽尋。松盤嶺腹蒼中翠，葉落波心靜裏沈。鹿度巖邊看活畫，禽鳴林際聽仙音。養生自是斯間好，勤政名軒敢忘欽。

暖

通閨秋偏長，關外候尚暖。乘時種宿麥，翻犁趁閒緩。塞堦既已畢，衣食粗云辦。閒閨象安

恬，繡衣何必遣。因知為政方，居敬而行簡。

### 寒

一夜山風急，曉來生峭寒。炎涼變何速，消息理憑看。坐愛當窗日，遊遲隔水巒。獨思尾蹕衆，寧不怯衣單。

### 古澗泉

古澗泉，淙淙滴滴幽崖斟。若有若無斷且續，盈科不競淺復深。却如南華已槁之木，又如五柳不弦之琴。古澗泉，惟應印古月以為心。

### 閏九月九日作

遙村近墅靄烟光，立馬崇椒了不涼。自是登高宜上塞，不妨把酒閏重陽。天臨澄廓目因遠，樹謝繁華意轉長。適以捷音待西北，每當歡樂轉徬徨。

### 明窗

山房淺置簷，羲牖暖烘幕。溫暾晃陽林，朔氣避陰壑。儒擬白駒速，農喜黃棉著。綈几陳芸編，稽古一斟酌。衰盾殊愛畏，絜矩知所託。

### 積素

積素迷離隱翠嶠，朔天見睨未云消。連村畫景張橫幅，著樹梅光（二）發野橋。駝怯石溪銅鐸細，人投茅店酒旗招。鳴鞭為卜邊關內，可得盈疇被麥苗。

暖

一綫嚴關變涼暖，雪無餘白樹留青。盈冲詎是移天紀，起屬由來據地靈。關內常暖於關外，或謂一堵之隔，氣候頓殊，不知長城

原據太行之幹，而築山界南北，涼暖自殊，此理易知耳。僕役衣單宵免歎，圃場稼納歲方寧。謂宜慰矣翻悵悵，西北捷音亟

待聽。

秋熱

丁丑

關外逢秋熱，忽如夏杪時。葛收箱欲換，扇衍篋重持。每逐含風爽，還思蒸雨滋。天恩各知否，華黍待成遲。

雨

關外夏雨少，山田早憂旱。遣祈即沾澤，稍救嘉種晚。谷中綠回蘇，黃萎惟山坂。邇來歷歷看，歉狀嗟盈眼。晚蕎及秋菜，皆可濟餐飯。既蘇復待滋，為之愁展轉。夜雨聽枕上，聲細意不滿。陵晨巖雲重，作勢續復斷。蓄極乃大霈，一洗餘威曷。隨處為祈年，詎止恣遊衍。

晴

密霖兩日極優霑，既雨宜晴意為忼。玉宇迴澄斜漢影，絮雲已避遠山尖。樹將暖旭輕籠牖，花與香風並入簾。稍幸樂成憑閣望，晚禾半得有秋占。

八月朔日作

天光澄絳河，雲影斂青螺。最是仲秋屆，偏饒塞景多。對時協平秩，昔日此卷阿。霽色生餘

暖，還欣利晚禾。

### 細雨

細雨剛經五日纔，灑空雩霰復徘徊。晚田恰喜蘇秋後，野老都云帶澤來。遠浦烟輕紅泛蓼，斜溪濕重綠漪苔。祈年法祖吾恆願，慶慰寧關天馬徠。  
是時哈薩克頭目頻有投順者，已遣使在途，尚未至云。

### 遣懷

豫齊數郡災，賑調亟籌畫。遙心繫淮徐，沙刷幸免戕。畿南乃波及，昏墊為愁劇。關北復遭旱，吾來始露澤。三輔雖有秋，遏糴非良策。所以粟轉貴，天恩殊可惜。  
近京一帶，自春徂夏，晴雨應時，秋成可稱豐稔。因畿南被災，商販轉運歉處取利，而關外歉收，又無入口之米，昨京尹奏秋成九分，而米價轉貴者以此。一心周九寓，曾無可逸隙。山莊縱自佳，耽佳豈可得。

### 初月

初見中秋月，還於避暑莊。一鉤清不盡，萬劫朗如常。溪水依微激，巖林掩映蒼。倚吟兼舉望，那礙晚風涼。

### 即事

衣試輕寒添幾多，野流無定繞陂陀。綠雲底事紅霞襯，始悟巖楓宿雨過。

### 山行

山行不用命巾車，散步尋幽亦足嘉。漲影過橋留枿莽，曦光落澗起烟霞。園中晴雨峰峰列（三），塞外暄涼日日差。何事未曾忘結習，觸懷便擬試吟叉。

八疊中秋帖子詞，命扈蹕詞臣和之 有序

玉宇宵澄，月屆秋中而愈皎；屏山雲斂，地臨塞上以彌清。不有新吟，何酬令節。聿溯宜秋綵帖裁詩，肇自丙寅；駐茲避暑仙莊賡詠，續成丁卯。嗣是磧山帳殿，載舉前規；時當太液秋風，咸循成例。環周一紀，冰輪常映冰心；疊和八巡，勝賞仍於勝境。益廣詞林之典故，並增歲紀之華編。

令人喜亦令人閒，端正何須藉斧刪。塞外偏饒風雅地，試看玉韜上鍾山。  
三千世界一輪光，金粟依然發淨香。妙趣風人如會得，解頭應勝鼎來匡。  
藉甚丹青命畫師，曲屏八疊恰成詩。湧金漫說錢唐好，一例冰光激磧池。  
山高底事上層樓，又紀清光丁丑秋。風景皇州爭較異，綵棚瓜餅貨街頭。

山村

山村歷巡農，築場納稼早。問雨夏曾霑，稍救青苗槁。所以秋成况，較迤南頗好。額慶為茅簷，庶得二鬴飽。共喜室家完，且免租賦擾。括田亦奚為，藏富原有道。

谷中

谷中落雨高山雪，向北應知氣候涼。陡憶熱河遙隔嶺，迴蘇晚稼未登場。急教巡視馳烟驛，且課倉箱歷野莊。彼此原多遺稔穗，便皴峰玉審何妨。

雨三首

海喇汗常靈應明，易為雨亦易為晴。重輜都過午圍罷，露灑秋山合洗清。塞上靈應山，蒙古語謂之「海喇汗」，不敢直稱其名也。凡車騎經過其側，無不雨雪，俗云「洗山」，屢試不爽。

空羅縹緲復春容，塞上烟光每慣逢。最愛雨收霞脚露，倚天玉積幾高峰。  
聲聲銀竹奏笙竽，潤景寒山故愜予。倚著方窗聊縱望，石渠似展米家圖。

夕

錫宴駐行鑣，乘閒興亦饒。夕陽隱西嶺，暝色逼疏寮。月上山空闊，風過樹寂寥。雲軒歸靜憩，清夢或逢堯。

熱 戊寅

關外秋禾勝去年，攬轡沿途為慰悅。山莊近遠罨黃雲，晶陽邇日更蒸熱。固云時燠催西成，當秋炎恐乖素節。紗衣傍午欲換葛，松牖延颺復搖箑。菜畦苜圃胥待潤，山岡易燥金曦烈。因思涼雨一湔溉，蕎麥作花方似雪。情知萬事難兼全，惟冀兼全意方愜。

微雨

微雨聞清夜，情知未即霑。山田多益善，塞苑冷何嫌。菜町葉方茁，蕎坡花尚織。老農與老圃，寧識慮常兼。

雨

塞山易作雲，今秋乃艱致。展轉切望霖，晚田漸憔悴。觸石膚寸合，雲雨盆傾至。既放更悠



揚，綿霽飄長勢。焚熱復何有，乍可夾衣試。蕎黍總回蘇，瓜菜洎餘惠。去歲關外旱，來即叨明賜。大田雖無救，遲稼半獲遂。今年早收定，雨暘頗愜意。邇來方待澤，此雨真稱瑞。勤民無間心，祈農寧較地。却懸關內望，曾否均霑未。

### 驛章至，知京師亦望雨，詩以誌事

昨對秋霖偶繼情，驛章今遞自都城。一般蕎菜原需澤，廿日風雲太過晴。敢以黍禾穫為解，惟茲宵旰慮常縈。先憂後樂本吾分，終覺樂稀憂每盈。

### 塞山

塞山過雨易生涼，清曉居然換袷裳。谷口沙含漲影退，樹根草挂蔓絲長。稱心野景呈虛牖，極目秋田蘇遠岡。傍午轉暄真恰當，為催萬頃稼雲黃。

### 新月

眉細中秋月，冰寒欲滿空。塞山高見早，素景迥難同。激灩滄池浪，徘徊疊樹叢。錘峰玉臺是，團鏡待懸東。

### 夜雨

怪底山涼切枕衾，霏霏夜雨落空林。繼霑更較前朝渥，疎滴旋聽密點斟。楓葉不殊蕉葉響，早田望到晚田心。霽非急陣應遐被，佇擬京師報喜音。

### 即事

厄魯蕩平回部連，止戈畢竟是何年。固緣弦上矢必發，終愧階前羽舞旋。勃律正聞踵來接，堅昆佇待首誅駢。山莊行慶暇奚念，念到庫車阿那邊。

### 涼

曉起居然愛向陽，塞山能爾變炎涼。篋中率欲藏輕扇，林下無煩泛野航。且喜秋雲纔過雨，易  
〔三〕愁白露乍為霜。一愁一喜緣何事，萬頃田雲漸作黃。

### 雨

山雲過午重，秋雨帶涼來。盆覺蕎蔬好，雅宜松竹陪。霑膏霏亦易，婪熱滌如摧。京報露仍  
冀，昨閱驛章，知京師雖得微雨，尚冀大霑。南瞻慮幾回。

### 京師得雨誌喜

京報傳來霽澤充，北南霑潤一朝同。十三日，熱河遠近，同時並得透雨。那當秋日還喜雨，慰在其中愧在中。

街頭米價早稱平，京城秋初，糧價稍昂，命發倉米分糶，近已平減。却為晚田望澤怍。蕎坂菜畦生意轉，欣同農圃待西成。

### 遣興

遣興寧蘄辭騁妍，山莊書史足精研。一心不息庶少過，萬事由來忌太全。詎以內安忘外靖，那期後樂只憂先。題詩四壁驗今昔，政學均慚尚闕然。

### 策馬

策馬度山村，過雨蘭蹊淨。高下稼滿谷，穗飽纍垂柄。便霜亦不妨，西成料已定。去歲此間

旱，經過切憂恚。今秋償倍蓰，額手為深慶。成〔四〕平戶口滋，穀寶繫民命。內地無遺利，關外率墜竟。一例祝倉箱，豈復分庭徑。設以漢唐論，守在此所屏。今古實異宜，要在因時應。保泰凜三無，勅幾勤八政。

### 咏掛瓶

大邑冰瓷巧就模，擷芳隨處貯瓊敷。郵程水陸延群玉，風月三千獲蕊珠。不是文殊命童子，定為長吉背奚奴。一塵弗染諸緣淨，豈識尋常有苑枯。

### 即景

拂廬幾點曉霜輕，跋馬剛欣卜爽晴。問景雅宜詩外趣，合圍總在畫中行。塞山涼暖渾無定，嶽樹丹青最有情。詎為從禽忘一切，庫車時刻念怵怵。

### 俊鵲聽歌

烏良海獻胡青驄，天閑牧養經再冬。本是俊骨易調習，今來備駕秋圍中。左旋右抽盡如意，發小殮大皆從容。一馳疊獲鹿曰兩，再馳更斃狐之封。千二百騎所共覩，無此此輩惟面從。致力可息佳名賜，亦不啻力德並同。

### 九月朔日作

策馬凌晨了不涼，縝紛疊嶺錯青黃。望中九日節將到，塞上今年暖異常。漫學鹿虞嫌候舛，欣同菜圃慶秋長。待圍每選嘉陰坐，攬景從容有句償。

鹿鳴于秋分前後，入哨率候是時，今年秋暖，故鹿哨尚未盛也。

題董邦達畫二首

秋林綉采

崑峰雄厚落飛泉，萬葉含霜綵翠鮮。命意由來非蠻像，得從扈蹕寫真詮。

宿雨含烟

曉烟欲泮意猶酣，野竹蒼蘆鎖碧潭。應是中庭動秋思，遄飛逸興到江南。

九日

木蘭雅合度重陽，處處登高是勝場。漢殿空傳蓬餌食，拂菻還識鬱金香。  
時布魯特隨園，亦預宴賜。唐書：勃律傳地宜鬱金。綠莎宜馬滋逢暖，紅葉藏麋艷鬪霜。小矣淮南稱盛會，鴻網萬騎總軒昂。

熱 己卯

十日前關內，徬徨畏炎熇。蒸雲懼為霖，更慮喝輿僕。五日前關外，曉寒峭嚴谷。長此將早霜，禾黍尚芄綠。即今晴已定，況復駐靈囿。轉燠審無妨，晶陽喜高暴。絮衣脫換紗。叢樾爽風逐。今秋已過閏，情知涼應速。此熱實利稼，秀實催嘉穀。靈臺非舛測，農扈有厚福。何莫非天賜，為民額手祝。

中元夕放河燈

過閏節占白露早，便教塞館度中元。却因少見翻如創，底識推遷不者存。夜浦愛看分芰炬，野塘亦自有蘭盆。金仙無物不超度，何事林間鹿避喧。

待月西峰，復下登舟賞玩。

山莊泛月偶一逢，況值新秋清且美。過望而復蔽東嶺，白傅詩中悟其理。急則計生因尋山，敵則氣作且置水。跋馬西峰最高處，下視東嶺乃眼底。不逾時尚未黃昏，東海湧出銀盤子。大千世界一廣寒，棗葉須彌難比擬。徐徐策騎下崇椒，月隨我共登舟矣。謝家高致昔留詩，別開生面惟予始。設云卿士在箕疇，旁求若濟亦將企。

詠唐時回銅器

有序

山莊舊藏古銅器一，似豆而短足，初以為三代青綠耳。迫視之形不饜饕，銘不乙丁，金銀錯其文則似回字。令吐魯番哈密回子等識之，惟識『噶愛』兩字，其餘皆不辨。蓋彼經文亦有今古之異，人不能盡曉也。嘗考回鶻唐時始通中國，史稱其先匈奴，匈奴與今之蒙古相類。則回回並非蒙古，且殊教也。《元史》始有『回回國』之名，或稱其為大食國種。大食在西域，此稍近之。明邱濬以為陳隋間始入中國，在在有之。在在有之者，亦云其繁滋漢土者耳。其的派固不離西域也。今平定葉爾奇木哈什哈爾，此實開闢以來不異之回地。回人若布魯特，若哈薩克，皆其蔓延繁滋，或雜蒙古種者有之。若唐史回鶻傳所稱善騎射、喜盜鈔者，實近厄魯特之習，而非回人所能。徒以『回鶻』音近『回回』，因屬之纏頭之類耳。究之耳食舌傳，魚魯千里，將以餘暇博考，此姑俟之。所喜者，適獲此器，於平定回城之時，殲厥渠魁，繫以白練，兆在斯乎，兆在斯乎。故從而為之辭。

不是辛尊與啟匱，考時應入李唐時。纏頭回鶻人斯用，餵肉葡萄宮所遺。「噶」讀作平聲旁行粗可識，冰斯古籀豈咸知。遷其重器茲先兆，佇待俘來罷遠師。

### 午暄

邇來候轉炎，山雨昨夜洗。驅盡婪尾熱，峭涼侵袂矣。予心望晚稼，未可便長此。午暄暴晶陽，華黍風尤美。如是期十日，黃雲庶可擬。

### 射

巡狩寧稽除授官，門前次第引來看。隨材簡職仍餘暇，以己先人與眾觀。弓燥手柔秋正好，侯

空鵠揭月輪團。

鄭司農云「方十尺曰侯，四尺曰鵠」。如是則宜其百發百中矣。今所謂把子者，高四尺，寬一尺，以之試箭。若鵠則周圍僅止一尺而五層，其中的則徑寸耳。以之試靶頭。所謂侯者，方不過六尺，空其中以懸鵠，俗謂之擋子者也。或中鵠，或

### 王維烈芙蓉秋鴨

霜寒北漠鴨南回，幾朵芙蓉貼水開。正是山莊秋半景，畫家那得見茲來。

### 聞京師得雨誌事

去歲山莊遙盼澤，

去歲秋旱，關外無不望雨。今年京縣渥霑膏。此間不雨熟已定，關外雨則氣寒早霜，茲不雨，實為宜也。彼處即晴惠正

叨。京兆奏至，雨後即晴，甚叶農候云。

內外黔黎均意廬，艱難稼穡為心勞。候暄程改駐清蹕，本擬七月十六日啟蹕往木蘭，以候暖鹿未哨，移於中秋後起程。消得林泉興一陶。

### 新月

一摺爛銀鈎，可望不可搆。堅欲玉尺量，却入西林裏。漢邊斂雲片，庭前舒桂蕊。情知中秋遙，珍惜早爾爾。全體本無虧，示冲有如此。

### 涼

半夜西風曉驟寒，數聲霜信度雲端。前朝跋馬看山稼，逮熟無妨意為寬。

### 即日

即日真情體物知，鶴糧或竊鶴啼饑。青田誰為供芻粟，可使由之意若斯。

### 中秋帖子詞九疊前韻

有序

晶盤瑩采，九十平分。金粟馥香，三千徧滿。寄崇情於玉塞，延麗矚乎雲莊。原夫閨律暑遲，田峻仁登禾之喜；邊垣秋晚，虞人需戒道之期。看來鶴鹿皆馴，祖澤常懷文囿；聽去笙璈並韻，慈顏近侍瑤池。重隄曲水，杯流虛白，毫光和寶剝浮圖互映；半壁高峰，鍾照空青，黛色與降蕃列帳交縈。遼哉萬里同晴，關外歡聲傳擗笛；捷矣百城俱下，湟中勁響應宣鏡。想一軍振槁先登，快甚吳剛斧琢；知二豎擒生立致，迅逾博望槎回。既開桂殿長筵，將啟蘅皋清蹕。紀旋鑣之盛事，合勝停鑣；廣秋帖之新裁，宜過春帖。曩者四篇製就，固已都捐霓羽靡詞；茲焉九壘吟成，庶幾共叶莖韶雅奏云爾。

勝地良辰可放閑，攜來詩稿自刊刪。開編恰是中秋帖，即事重吟玉塞山。

朗照寧分中外光，揮毫墨染桂花香。興州景詠纔四度，

合京師木蘭諸處，九疊前詞於山莊，已為四度帖子矣。

西極功成速一匡。

洗洗猶有逐回師，獲醜佇成奏凱詩。雖共儒臣償佳節，塵懷遙在察汗池。

二首逃往之地。

### 登樓

餘閑聊爾試登樓，近遠山田報有秋。一月幾回開口笑，萬幾無間悉心籌。錘峰早上團團魄，列水寧殊今古流。此夕此時只宜樂，為懷西旅却增愁。

### 所見

墾遍山田不剩林，

三十年以前，凡關外山皆有木可獵，今則開墾率過，不見林木，非木蘭獵場禁地，皆不可行圍矣。

餘糧棲畝幸逢霖。不教緹騎輕蹂躪，能忘蒿

官惕照臨。愁以得之慰亦切，難而獲者惜猶深。可知攬轡徐行處，多少思艱圖易心。

### 涼六韻

昨日塞雲重，興安想雪飛。迫來嵐氣峭，迎去曉暎微。複障聊成憩，平林旋合圍。蹄輕宜獵騎，身冷換旃衣。冰凌擊去隨溪下，霜華到午晞。馳驅藉取暖，屢屢玉鞭揮。

### 八月二十三日皇考忌辰作

二紀修成昔，一悲直至今。北來秋序每，南望白雲深。善繼會何有，時思益弗禁。從頭讀遺詔，予小子每值皇考忌辰，必盥手恭讀遺詔一過，誌不忘也。敢不勵初心。

### 捷報

逆酋霍集占兄弟，一創於霍斯庫魯克，再創於阿爾楚爾，勢蹙窮竄，將軍富德等急躡之於



伊西洱庫爾，是拔達山連界地也。時賊衆據峰負固，我兵整陣剿擊，中發大神威遠礮，兼簡偏銳，用鳥鎗夾攻，賊中有伯克等，悉其大隊呼籲乞降，霍集占自山頂遮截，至手刃之，不得止。而我兵四路設伏盡起，有徒步投〔五〕絕壁進者，轉戰一晝夜，賊遂大潰。計獲賊衆一萬二千有奇，鎗械二千有奇，牲畜一萬有奇，逆酋僅以殘衆四五百人逸去。富德等傳檄拔達山部長，曉譬順逆，令其尅日縛獻。至是捷聞，朕以二酋一日不獲，軍務一日不竣，雖仰賴鴻庥，收城服衆，而旁午擘畫，何能釋懷，爰誌長言，佇期永靖，詎得已哉。

待圍小憩坐屨顏，捷報飛傳達玉關。奏牘機宜悉覽遍，降蕃輜重盡遮還。千里直進伊西洱，二豎旋逃拔達山。除蔓斯之未底定，可辭畫策盱宵間。

### 九日

萬嶂嶽崎天沆瀣，木蘭菊節度今朝。登高即目無遺照，在上惟懷不敢驕。勝地恰宜風雨度，

是日微有風雨。

芳筵兼聽管絃調。

以節日賜食。

近臣那易知有喜，劇待佳音正不聊。

時將軍富德等遣使拔達山，諭擒逆酋和卓木兄弟，尅日往返，通計軍報旦夕當至行在，

深用廬懷。

### 野郵

築場納稼石田收，塞景寥蕭罨野郵。兩嶺蒼烟連樹迥，一川寒水共秋流。罷圍聊可輕輿御，

自御圍啟行至出哨日乘馬，罷圍始御輿，邇年來率以為例。

有暇何妨警句酬。回望雲山縹緲處，幾多清興彼中留。